

Arquimar Barbosa de Oliveira  
Laffert Gomes Ferreira da Silva  
Manoel Galdino da Silva



# SAFINI VAGANA HAGHI FORIHIKI IDA

Amazônia-ra nahihavi vini ida safini vagana

Arquimar Barbosa de Oliveira  
Laffert Gomes Ferreira da Silva  
Manoel Galdino da Silva

# SAFINI VAGANA HAGI FORIKI DA

Amazônia-ra nahihavi vini ida safini vagana



Lábrea - AM  
2017

### Coordenação:

Arquimar Barbosa de Oliveira

### Organização:

Arquimar Barbosa de Oliveira  
Manoel Galdino da Silva  
Laffert Gomes Ferreira da Silva  
Fabiann Mathaus Dantas Barbosa  
Márcio Rodrigues Miranda  
Antônio Cleber da Sousa  
Paulo Sérgio Carlos Arruda  
Judson Medeiros Alves  
Laura Cristina Leal e Silva  
Alessandro Eleutério de Olivera

### Autores

Arquimar Barbosa de Oliveira  
Laffert Gomes Ferreira da Silva  
Manoel Galdino da Silva

### Ilustração/Desenho

Antonio Sameis de Souza Veiga  
Manoel Galdino da Silva

### Vetor Gráfico

Antonio Sameis de Souza Veiga  
Manoel Galdino da Silva

### Capa

Manoel Galdino da Silva

### Tradutor

Edilson Rosario Paumari

### Revisor

Timóteo Lúcio da Silva Paumari

### Dados Internacionais de Catalogação - CIP

O 48 Oliveira, Arquimar Barbosa de

Safini vagana hagihi forihiki ida: Amazônia-ra nahihavi vini ida safini vagana / Arquimar Barbosa de Oliveira, Laffert Gomes Ferreira da Silva, Manoel Galdino da Silva, Tradutor Edilson Rosario Paumari- Amazonas, 2017.

81f. : il. 30cm.

ISBN: 978-85-69719-06-9

1. Educação. 2. Física. 3. Ótica 4. Ensino. Título II. Oliveira, Arquimar Barbosa de

CDD 530.8616

# PAPIRA HOJANI KABA'I HOJAKI IDA APLICATIVO KANIA JABONI

Papira hojani kaba'i ida varani, amonahaki ida nokiavahani celular Android kania, aplicativo-ra vahojakia. Hihida varani papira hojani kaba'i hojaki ida ojomo'ihira kakodiavini, varani nihanini-ra ogavini kaimoni hini hojani. Biogavini jaboni ida safini vagana nihanini hojani, Ija'aria binofivini, biogavini, bianikhahi hojaki ida abosirini *Google Play* kania.



## HOJAKI HIDA OJOMO'IHI KAPAPIRANI KANIA

Jahaja kaimoni ida isai vakadi'ojomo'ivini, oniani ida hihida papira amonahani nihaja,ija'ari hoariha avigaja kaimoni. Vaka'ojomo'ihaki vakadimoni hini jaboni, vakadi'ojomo'ihira-avanakaarahovini kaimoni jaboni. Vakava'ihokivini kaimoni ida badara 2015 safini vagana nakaidiva vahani kaimoni hini.

Jahaka'oaki ida safini vagana mahi hahavi akadimoni hini,jahaki ida aka'ojomo'ivini ida safini vagana, ojomo'ihikagorani hiriki kania jaboni. Safini vagana biakodiaki jaboni ida ihai kabadanihia,vaka'ojomo'iki,nahina namithaki arabo hoariha hoja'ini ida *internet*. Jahaki ida akadihojai, ija'ari arabo hoariha vakadihojai,vakadi'baihiki,vakadijoroni, vakadibadani-ra vakava'ibodivarani vini nihanini.

Papira hojaki bana ida safini vagana, nihanini bana. Hihadani vaka'ojomo'ihaki vakadimoni hini. Hihida avaibaviki kaija'arini,vakadihojai forihini hida varani jiriki hida.

Jirini papira hojani kaba'i,amonahaki jaboni ida nokiavahani (*Tablet*, celular *android* oniki kania) nokiavahani ida *android* kania. Nokiavahaki jaboni ida safini vagana forihini k a s i v a n a h i k a i m o n i f o r i h i n i h o j a n i .

Hihida papira jirini amonahani-ra naabosiki ida Conselho Nacional de Desenvolvimento Científico Tecnológico - CNPq, InstitutoTIM vania biakodiaki ida abosini, amonahani jaboni.

## Sumário

- 7** **Kapitulo 1 - NIHANINI NOKIANI IDA SAFINI VAGANA**  
Nihanini vani ida nama korini nokiani nihaja?
- 28** **Kapitulo 2 - SAFINI VAGANA KORINI ANAHOARIHAONIKI**  
Nahina ida avafani korini-ra anahoarihaonija koda?
- 46** **Kapitulo 3 - SAFINI VAGANA PAHA AHA'DIRI'DIRINI**  
Nihaniki vani ida oragarivini hija?
- 62** **Kapitulo 4 - NOKHOI VAGANI, VAGANI NOKIAVAHANI**  
Nihanini vani ida igitha bakibakinia nokhoni naha'dini hija?
- 73** **Kapitulo 5 - SAFINI VAGANA BIKAABOKAKI IDA BINAJI'BINI**  
VINI IDA VAGAKI-RA NAMONAHAKI  
Nahina mani ida vagaki-ra namonahaja safini forihiki?
- 80** **Kapitulo 6 - MONI OKHANI KAIMONI, VAGAKI-RA AVIKHAKI**  
KAIMONI HINI JABONI  
Nahina kaimoni mani ida ahoi forihiki-ra vanaibabibini hija vani bodiania?



# KAPITULO 01

## NIHANINI NOKIANI IDA SAFINI VAGANA

Nihanini vani ida nama korini nokiani  
nihaja?





Safini afana kamahini,hojahi ida nama korini, magimagini vaforini nama nokiani.

Paolo,Txiago vihiki vanokivini ida nama jahani,vakava'ibodivarani'ih i ida vaabono avanapahisirihavini,vikanahana vaini kapahania.



Paha bodinia vakasivanahana oadani,nama-ra vadani'a'aha ada Txiago,  
binoki ihi ida nama koorinini,nama-ra nahihavivini binokivini. Paolo-ra  
nana'dohi'aha:

-Paolo,Nahina mani ida nama-ra nakorija?

(Paolo) Nahina..nama-ra nakoriki..Ni-ogaki! Ovahojaki ida  
kodiva'ibodivarani!




(Paolo) Nahina..nama-ra nakoriki...


Ni-ogaki! Ovahojaki ida kodiva'ibodivarani!

Anana'dohihava ada ojomo'ihhi abono Gaojino oniki.

(Txiago) Jahaki ida kodiva'ahi!

Avikha'aha adani isai ojomo'ihhi kagorani ibavini kania. Vakadiva'ibodivaranihi asohini,asohirini vakahivini. Avakhano'aha vanoki'aha ada ojomo'ihhi abono vithina. Kidivithi ibavinia kidipapi-ra nahojavini ibavini kanamania kidipapira-ra badani'avini.





(Paolo) Ojomo'ih i abono.

(Ojomo'ih i abono) A'onivaniti isai. Avi'oi, vavithi onia.

(Txiago) Anofiki ida aogavini ida nahina.


Akanana oadani vaini kapahani, akadiva'ibodivaranihi.

Ni-aogaki ida akadiva'ibodivarani sohini, sohirini.

Nahina mani ida nama korini nokiani nihaja?

Akaabokaravini aogavini mani ida, hida haria rakhaja. Anofiki ida

haria ika'ojomo'ivini-ra ikabokavini.



Vi'di,vi'dina hojana oadani ada ojomo'ih i abono, bigathi'ih i ida papira  
kidipapira-ra nahojavini ibavini kanamania hojaki. Niha'aha:  
(Ojomo'ih i abono) -A'onira oka'ojomo'ivini kaimoni hini, jahaki aogavini  
afopa'itxi ida safini vagana khanoni hida.  
(Paolo) Aogaja kaimoni ida safini vagana?

Nihanini vani ida safini vagana nama-ra nakorivini  
hini-ra kakodiavini hija?

(Ojomo'ih i abono) Hojarihi ida safini vagana,  
ni-nama koriki nokiani hiki jaboni?

Safini vagana kania hojaki ida danona komini forihini hojani.

(Txiago) Ka'oa hiki ida! Okava'ibodivaraniki ida vaini kapahani, paha  
akajoroni ibavini mar oniki ka'oa kakominini forihini.



(Ojomo'ih i abono) Iniani bana Txiago.

Hojamanija ida komini forihiki

ahoarihaoniki bana.


Paha kakominini vani kahoarani

ida ija'ari bikanoki jahakija.

Vaporo, kanava kihiki kakomini ida

kanokiavahaja. Kahojaki ida komini kanokiani

forikihini jaboni, ija'ari bikanokiravini kaba'i.



(Ojomo’ihi abono) Komini kanokiani forihini vani kaikahija hajoa televisãoa, GPS, celular kania. Oniani ida nabadaninihija, nahokini forinihaja jaboni. Komini kanokiani forihini kaba’i hojaki nama-ra nahihavivini. Ni-ija’aria bikaabadavini bikaabokaki ida. Rajomi hiki ida, onia ihojani oadani radahaki ida kadania komini forihini iogapa’itxiravini ida.

Ni-ikaabokaki ida igathivini jaboni.

Kanahoarihakhamani hiki ida komini forihiki nokiavaharini kaba’i. Hoarani

napaja-ra kaitonia vini, napaja-ra kaitoniaravini hojani ida.



(Ojomo'ihhi abono) Kakakhamani hojani,

danoni napaja-ra kaitonia vini

ida komini forihiki nama-ra

nahihavivini. Napaja-ra kaitonia

vini, napaja-ra kaitoniaravani

kaba'i hojani, ija'ari binokiravini

kaba'i. Ikava'ibodivarani adani

isai, ija'ari karaho khama

vaki'darahana, vakadiki'darahai


jorani isai forihirina.

Isaia bikainamoki ida kidiki'darahai danoni,

karaho kaki'darahi-ra kaitoniavini kaimoni. Niki ida


komini kanokiani forikihini hojani ida nahina nokiavahariki

nama-ra nahihavivini.







Hajo napaja athi-ra gathani vini forihini nama hojaki ida komini forihini, ija'ari binokiravini kaba'i. Rajomi hiki ada moi'di avana karoiroihaki forihini sa'ai ko'bamiki hina ada moi'di avana napaja-ra kaitoniavini.




Itxaniki ida ija'ari jaroni amokhinini-ra aniki raio X oniki. Kapohi ahapina-ra anamaakariravini, ni-ija'ari bikabokaki ida binokijahakivini.



Hihida espectro magnética oniki ida komini forihini kaikahini nokiavahani hajoa, celular kania, controle remoto oniki kania, raio X kania jaboni. Nahina hoariha, onivani forihiki kania nokia vahani jaboni. Niki kania nokiavahaki ida eletromagnéticas oniki.



Hihida rajomi jararini kania nokiavahajahakiki ida komini forihini. Nokiavaharini kaba'i hojani ,akadiva'ibodivarani haria nava'isohiki forihini, korini ahoarihaonini hojani. Hahavi anokiki ida hida hojani. Vahojaki adani tapo'ija harifori vihirina nahina-ra vanokijahakivini.





Safini vagana ija'ari binokivini vaforiki forihini.

Kabodihadihani korini ahoarihaonini ida safini vagana, ija'ari binokivini vaforiki forihini.


Safini vagana kania hojaki ida korina ahoarihaonini katopahiari forihini ida nadaraki, korikorini kaba'i nadaradaraki, avafani korini forihiki, korini arafiaki, nadarani kaba'i barabarani.

(Txiago) Ahhh! Safini vagana kania hojaki ida katopahiari forihini.


Nokiavahani ida korina ahoarihaonini.


(Ojomo'ih i abono) Ka'oa oamani ida.

(Ojomo'ihhi abono) Inakabodihadihahi ida koriki, nadaraki, korikoriki,  
korini kaba'i nadaradarani ivahojaki bana ida vaforini nokiani.



Anoki'avini ida papira hojani ida nihanini komini forihini hojani nama kakakhamani. Katopahiari forihini ada safini vagana korina ahoarihaonini, ninivani jaboni hojaki ida celular, televisãoa nahina hoariha-ra nahokiki forihini papira hojani. Ka'oa hini ni-ija'ari binokiki ida nama hojani kakakhamani kaba'i. Kanahoarihakhanihiki ida danoni hoarani napaja-ra kaitoniavini, hoariha napaja-ra kaitoniaravini hojani.








(Ojomo'ihl abono) Aogavini afopa'itxi  
ida safini-ra navagaki nihanini  
hojani. Bona khama a'oni-ra oka'ojomo'ivini,  
avarigaja ida nihanini nama-ra  
nakorivini-ra kakodiavini ida safini vagana.

(Txiago) Onofiki ida oogavini asia!

(Paolo) Hovani jaboni!






(Ojomo'ih i abono) Safini vagana arabo a khanoni vani, bikaragaja ida ija'ari-ra kanava'ikhamini nahokini hiki, okisijinio ( $O_2$ ), nitrojinio ( $N_2$ ) oniki.

Hihida safini vagana akarafarakhamani nokiani forihini. Napaja-ra kaitoniaravini. Korini ahoarihaonini nokiani hojani. Oniani ida safini vagana vaforini forihini nanokiani nihaja akadiani khanoni. Akarafarakhamani vani ida ija'aria binokivini korini nama hojani nokiavahani.



(Paolo) Okaijo'ava ida oka'ojomo'ivini vahabini. Hari. Oga'iki ida nama-ra nakorini nihija, safini vagana korini kabodihadihani ahoarihaonini.

Hojani ida safini vagana napaja-ra kaitoniavini, hojaki jaboni ida napaja-ra kaitoniariki. Khanoni ida safini vagana arabo kania, bikaragaki ida nahia nokhoi ka'oa nokiavahariki. Oniani biakodiaki ida biakanarafarakhamavini ida safini vagana napaja-ra kaitoniariki komini forihini hojani. Nama-ra nahihavivini nakorivini hini jaboni.



(Txiago) - Ojomo'ih i abono, onofiki ida ogavini. Niha ninimanija ida safini khamananina, apahisirina nokiavahani ida nama nadarini?

(Ojomo'ih i abono) Jahaki ida kadana'dohi. Safini khamananina, apahisirina nadarani nokiavahani nihaki ida nama, safini arabo-ra nanapajahivini mani ida.

Sirisiriki ahipini-ra nahojaja jaboni araboa, safini kahararakhamania.

Oniani ida akadiania kaikahini viahani akanarafarakhamani hija ida safini vagana korini ahoarihaoninni, napaja-ra kaitonia vini hojani.

Oniani ida safini khamananina, apahisirina nama nokiavahani ida nadarani.



(Paolo) Khai oni'aki ida kadakakodiahi, onofiki ida agorana okhana kodiabi'i-ra onanokiahivini hini ida oka'ojomo'iki hidakaba'i.

Aokha'ava Txiago?

(Ojomo'ihini abono) Hari isai, ba mahi hoariha.

(Txiago) Hari, hari





## KAPITULO 02

SAFINI VAGANA KORINI ANAHOARIHAONIKI  
Nahina ida avafani korini-ra anahoarihaonija  
koda?




Jama bodini vaadahana oadani Paolo, Txiago vihina,  
vadavani'amanani'ihhi avafani.

(Paolo) Inokiminija ida ava afani ahapini anokiki nokiani  
korini. Hojaki ida nokiani barabarani. Onofiki ida oogavini  
afo pa'itxi! Nahina koda ida ava afani korini-ra anahoarillaoni vini hija?  
Nahina koda ida avafani nokiani nakorini hija?  
logamanija ida ija'ari haria kakodiaki kaimoni aogaja kaimoni  
ida nihanini?



(Txiago) Oogaki ida ojomo'ihhi abono Gaojino oniki haria kakodiaki kaimoni.


(Paolo) Ka'oa oamani. Kidiania aokha'ava.



(Ojomo'ihni abno) A'onivaniti isai.

Avanofimanija ida avaka'ojomo'ihani afo'iana.

Avariga'iki -ra avanakarahovini?



(Paolo) Akadi'ojomo'ih i abono, hidanija avajahaki ida kada'ojomo'ih i safini vagana haria ika'ojomo'ivini hiki.

Aakhanona vani kodia'i, kodiamia-ra va'ora oni'avini hiki ida aka'ojomo'iki. Aakhana oadani vani vada ani'ajahakiki ida nahina aradaki afohahavi.

Aogavini aka'ojomo'ihana vani nahina-ra aogavini anofihaha oadahaki hari.

Rajomi hiki ida jama bodinia anokiki

ida ava afani hahavi korini

nokiavahani. Nokiavahaki jaboni ida ava

afani korikorihani, barabarani, nadaraki

hojani jaboni. Akadiva'ibodivarani hiki ida

nihanini korini ahoarihaonini nokiavahani ida

nahina afohahavi?





(Ojomo'ihhi abono) Hihida na'dohi-ra igathanivini kaimoni, jahaki ida iogavini ida safini vagana khanoni araboa, paha kania hikori forihini ija'ari amokhinini nokiavahani. Avarigaki ida safini vagana vaforihini hojani kaba'i ida korina ahoarihaonini katopahiari forihina.

(Paolo) Nadaraki, Korikorini kaba'i nadaradarani, korikorini, avafani korini forihini, koriki, korini arafiai, barabarani.

(Ojomo'ihhi abono) Jahaka'oaki ida.

Asohiki ida idionivini, katopahiari

korina ahoarihaonini

forihini idionivini.



Safini vagana nahina-ra gathivini vani nokiavahaki ida vaforini.

Oniani ida pati bihi-ra gathivini vaforini nanokia jahaki nihaja.

Bihia hojaki ida nahina nokhoi ka'oa nokiavahariki asafi

namani anikhoi okhaonanini ibavini forihini ida bihi kania hojaki.

Oniani ida safini vagana biakodiavini

hija ida vaforini nokiani ida bihi

afohahavi. Nahina kania

khanoni. Hikori forihini

hojani.



Garihi ida vagani nahina pororoki kania, nokiavahaki ida

pororoki ka'oa. Jomahi savini kania garihi ida vagani,

pororoni vani forihini ida nokiavahani.

Nokiani ahoarihani korini ida vagani korini, vaforini,


nadaraki hini anahoarihaonini

nihaja.



Hikori kania garini forihini ida safini vagana oniani ida nahina korini-ra anahoarihaonini nihaja. Ija'ari nokhoni bodinia khanoni ida vagani anokijahakivini hija ida nokiani korini, korikorini. Oniani jaboni ida akadiva'ibodivarania aavasohivini nihaja, korini, korikorini ahoarihaonini jaboni.

Vagani vaforini nokiani



(Ojomo'ihhi abono) A'oni-ra onava'isohiki bana a'oni.

Nahina hahavi hojaki anokiravini kaba'i pa'itxi ka'oani hojani anikhoi okhaonanini ibavini asafi namania forihini hojani átomos oniki.

(Txiago) Nahina mani ida átomos onija?

(Ojomo'ihhi abono) Nahina pa'itxi nokhoi ka'oa nokiavahariki ida átomos oniki. Rajomi hiki ida gora amonahani kaimoni ija'ari bianakaramisahanani ida gora ka'oahani kaimoni hoarani biatahananavini, kajokaraharahani hojani. Oniaro fori hiki ida átomos oniki hahavi kania hojani.

Rajomi hiki ida taboa hoarani ipohini hojani atamisahanani rijorijohani oniani ida átomos oniki avahokiki kania.

Hihida araboa avahojaki hojaki ipohini ida átomos hojani, paha, sirisiriki kania, nami kania, ava ahapini kania jaboni.



(Paolo) Nokhoi ka'oa nokiavahariki akarakarakhamani

kaba'i hojani ida átomos oniki. Hoariha nokiani forihimanija ida afohahavi?


Iniani, hihida avaibaviki vahojaki adani átomos ahoarihaoniki bana.

Ni-hoariha nokiani forihini bana. Nokiavahani ida korini, korini anokivini

ahoarihani. Nahina hini, rajomi hiki ida paha nihanini nokiani, jokira vaforini,

barabarani nokiani ahoarihaonini. Rajomi hiki ida anokiki kania


hojaki ida átomos oniki nahina binokiravini kaba'i hojani.




(Ojomo'ihī abono) Ava afani kania hojaki ida nahina pa'itxi nokiavahariki clorofila oniki. Hihida avafani-ra nakorini nanokianihiki bikaabokaki ida safini vagana-ra kidafivini forihini. Ipohini hojani vani avafani korini-ra nahojavini hija. Oniani ida ija'ari binokivini korini avafani kania nokiavahani ida ipohini clorofila oniki.



(Txiago) Haria ika'ojomo ivini forihiki ida hidanija korini, koririni nokiavahani ida safini vagana. Korini ahoarihaonini hojaki ida napaja-ra kaitoniaravini. Hihida nahina pa'itxi avahani kania hojaki ida clorofila oniki, anikhoi asafi namania forihini hojani, bikaabokaravini ida bikidafivini forihini anokija ida avafani korini



(Ojomo'ihī abono) Ka'oa hiki ida Txiago. Hojani ipohirini ida nahina pa'itxi nokhoi ka'oa nokiavahariki clorofila oniki. Oniani ida korini anahoariha nihaja ida ava afani hojani ida caratenóides oniki. Nokiavahaki ida korikorini hojani ida ava afani. Ni-korini nokiajanaki ida bana. Oniani ida ava afani korikorini kania nokiavahani jahakini njihaja. Nokiavahani jaboni ida ipê oniki afani kania, naraja kaafania, sida'i afa jaboni nokia jahakini ida.



(Ojomo'ih i abonno) Ni-ava jama bodinia hojaki hokini kaimoni hoarani jahaki ida clorofila oniki, jahaki ida arabo hahavi kaimoni hini jaboni.

Clorofila bikabokaki ida biobaivini ida safini vagana kidiania hojani.

Biobaivini binamonahaki forihiki ida nokiariki fotossintese oniki. Oniani vani ida ava hokini, nadanoni hiki-ra kabokavini hija. Biobaivini vani



bianahoarihavini, biarakhaonaniki ida ava'i aharoroni-ra akabokavini hiki jaboni arabo ahojana oadani.

(Txiago) Oka'ojomo'i iki ida avafani kania amonahani ida ija'ari najahavini nokiani korini nihaja, nahina afohahavi kaimoni hini jahaki ida


(Paulo) Ni-avafani ka'oa kaimoni jahaki ida clorofila oniki, jahaki ida nahina hahavi kaimoni hini.

(Ojomo'ih i abono) Ka'oa oamani oni isai. Hojarijavaha ida oxigênio oniki.

Ni-ija'ari va'ini harorohani-ra kabokavini hiki. Ni-vahojaki vahokina adani igitha, tapo'ija nahina hoariha kava'ikhamini hojani.







(Ojomo'ihhi abono) Avanokimanija hida makari akaimahaki nokiani korini nihaja, igitha raboki bihinia nokiani, nami kania. Oniani hojani ida nahina anokiki-ra nakorini hini anahoarihaonija. Hojani ida safini vagana, nahina hoariha vagani-ra kabokaki. Oniani ida nahina hahavi korini anahoarihaonini anokivini jaboni nihaja, (Ojomo'ihhi abono) Hida vikha, onofiki ida a'oni-ra onanokiahivini ida nahina hoariha avarigariki. Vanoki hida nokiani vaforiki-ra oanihi, oanaabosihi nokiani nadarakia.

(Txiago) Oao! Akadimakari hida nokiani ahoarihaja.  
kania, nokia'iki ida porproki, vaforiki kania nokiaki hida nadaraki maina.

(Paolo) Niki oavani ida okava'ibodivaranija niki namithaki?  
Hojahi hida/vagani korini nihaniniki koda ida nokiavahani?

(Ojomo'ih i abono) Hiabana akaijo'ava?




(Txiago) Kahomarahi nokiani forihiki ida?

Makari akaimahaki nokiani ahoariha ianaki hida , vaforini nokiaki afobinini, nokiani ahoarihariki.

(Ojomo'ihhi abono) Kahomarahi hirihi hida,  
aka'ojomo'ivini ida ogavahani nihaja!

(Paolo) Ojomo'ihhi abono, vada oni'avini vani  
okava'ihokija ida. Hi'ida vagani hoarihariki-ra  
ianivini, hoariha vagani koriki-ra inaibavi avini  
akadimakari nokia'ihhi ida pororoki,  
koriki ka'oa hojani.




Akaijo'ava ida vagani nokiani korikorini maina-ra anaibavivini nokiaja kaimoni ida makari akaimahaki pororoni, korikorini maina nokiavahani?

(Ojomo'ihia abono) Hiabana akaijo'ava!


(Paolo) Niki oamani ida okava'ibodivaranija!

(Txiago) Kahomarahi hirini kahiavahani, nihanikia vani ida ojomo'ihia haria kakodiavini nihaja koda?



(Ojomo'ih i abono) Aka'ojomo'i'iki ida nokiani vaforiki ahoarihaoniki hojani. Hojaki ida vagaki nokiani hoarani hini, rajomi hiki ida nadaraki, korikorini kaba'i nadaradaraki, koriki, korini arafiaki, barabarani kaba'i, nadaradarani nokiani.

Aniahi ida vagaki korini ahoarihaoniki bona ija'ari binokijahakiki ida makari bivahojani ida nokiani ka'oa hini korini, vaforini nokiani. Oniani vani ija'ari biavasohijahakiki ida nihanini makari nokiani. Hojani ida vagani nadaraki nokiavahaki ida makari pororoki, nadaraki hojani. Hojahi ida koriki nokiavahaki ida makari korini afohahavi. Oniani forihi manija ida ibavini ida vagani korini nokiani, korikorini jaboni nokiavahaki ida ahoarihaonini bana.





## KAPITULO 03

SAFINI VAGANA PAHA AH'A'DIRI'DIRINI


Nihaniki vani ida oragarivini hija?





Varabahaha adani isai vaini avakavikha'ih i da abiha, kodahi hiki, jorakia vakanokiha ada abaisan. Txiagoa jara bini'a'aha ada abaisan biavini'aha bivini'aha.





(Txiago) Ha! Ada oragari'aha afo'iana!

Okava'ibodivaraniki ida jarari ka'oa ovinivini onofivini, ni-oanasohi'iki.

(Paolo) Iragarivini hiki ada abaisana jara ini'avini kidiania ka'oa.

Kodiabi'i hora ka'ojomo'ivini hiki ida viaha pa'itxi-ra jara oni'avini oanasohivni  
kaimoni.

(Txiago) Ni-ogaki ida nihanini! Kodiva'ibodivarani-ra kosonakhamavini.

Onoki jahakiki hada abaisana hida.



(Txiago) Bona khama ovini'iki hada abaisana!

Kadavarani ka'oa hiki ida.

Nihanini vani iogavini nihaja?

(Paolo) Kodiabi'i vani hora ka'ojomo'ija.


Kodi'arahoda bika'ojomo'ivini forihini, hora ka'ojomo'ivini nihaja.


Bini'aki ida abaisana haria nokivini vani okha pa'itxina nihaki.

(Txiago) Vara ani'ahava ada akadi'ojomo'ihini abono Gaojino oniki, mahija  
nahina haria ni'avini.

(Paolo) Jahaki ida aokhana!

(Txiago) Akadi'ojomo'ih i abono, ira akanamoni vini hiki ida hidanija  
arabahana, kodahi, abiha-ra akavikhavini.  
Akanokivini ada abaisana jarari ka'oa jara oni'avini.  
Jara oni'avini ida jarari kania kaba'i oragarimani'aha.'  
'Bamija oaviniha ada abaisana oragarimani'aha.  
Naothinia Paolo hora nava'isohi'aha kidiabi'i  
bika'ojomo'ivini forihini.  
Abaisana viaha pa'itxia oavini vini.  
Abaisana-ra akanoki ianavini vani oavini'aha  
ada abaisana. Hora nava'isohivini fori hini.  
Ni-okaabokaki ida ogavini nihani nina  
abaisana naradahanahiki.





(Ojomo'ihī abono) Hojaki ida ipohini abaisana ija'ari biviniravini

hiki. Rajomi hiki ida hoarana abaisana ija'ari-ra nokivini. Oniani ida ija'ari bivinivini biragari vini hīja. Papira aka'ojomo'i vini jaboni haria kakodiaki bana ida. Onajiriki bana ida jirihi ibavini mahija avavasohivini nihanini, avarigaja kaimoni. Araba kamahini abiha, kodahi, jomidi hiki-ra avavikhahi, hari'a abaisana kania jara ni'avahana paha nokiana. Hi'ida abaisana forihiki ovari amokhinina ida ija'ari nokhoni vagani-ra kanikakhamavini hiki jaboni.



(Paolo) Aha'diri'dirini ida safini vagana paha garini! Nahina mani ida paha na'aha'diri'dirija?  
(Ojomo'ih'i'abono) Paha-ra na'aha'diri'diriki ida safini vagana paha bodinia  
garini. Niki-ra nanokiavini hiki ida safini vagana paha garini, oniani ida  
nokiavahani ida aha'diri'dirini. Oniani ida abaisana ka'oa hina ija'ari binokiravini  
hija. Nokiavahaki ida abaisana amokhinina paha bodinia.


Aha'diri'dirini paha garini ida safini vagana ija'ari-ra kanajajorini hiki. Rajomi hiki ida ija'ari binokivini ida paha 'dako bihiariki, kania ibavini ija'ari o'oini paha bodinia biogavini ida bihiani nokiani forihini ida paha.

Niki-ra nanokiavini hiki ida safini vagana paha garini. Oniani ida ija'ari paha bihiarini binokivini hija. Napaja, maakaria nokiavaha jahakiki ida safini vagana paha-ra nokiani bihiarini hojani. Abaisana kania nokiavahaki ida maakaria.

(Txiago) Ojomo'ihī abono, abaisana ija'ari-ra nokivini maakaria?


(Ojomo'ihī abono) Jahaki ida kadana'dohi Txiago.

Iniani. Abaisana ija'ari amokhini-ra nokivini napaja.



Amokhinina paha nokiani

Ovari ka'oa hina



(Paolo) Hanaja vania nokiavahaja  
jaboni ida paha safini vagana bihiarini  
nokiavahani?

(Ojomo'ih i abono) Hojaki ira rajomi  
ipohiki niki kaimoni.

Anahojahi ida papira jirini hiki  
paha avahani bavinia. Nokiani nihaninija  
koda bana ida?

(Txiago) Ogaki ida. A'daka'dakani  
forihiki ida nokiani bana.

(Ojomo'ih i abono) Ka'oa oamani ida Txiago.  
Nokiani a'daka'dakani forihiki ida, ka'oa hirini,

ka'oa hini ni-a'da'dani hojaki.

Garini ida vagani paha oniani  
ida nokiavahani anahoariha nihaja.







(Txiago) Safini vagana paha bodini garini vani ida na'aha'diri'diri nihaja?

(Ojomo'ih i abono) Safini vagana bikabokavini ida nahina-ra radavini nokiavahaki ida ha'dina anahoarihavini danona napaja-ra kaitonia vini, napaja-ra kaitoniaravini jaboni. Rajomi hiki ida nokhoi vagani nahani hiki. Vaforini danoni nokiani. Oniani ida ija'ari nokhoni vagani-ra najahaki-ra vahojavini nokhonia.


Nokiavahaki ida nokhoni 'ba'dani akarahoni, pa'itxini nokiavahani hojani. Hihida okanokhahaki rajomi hiki hida onokho 'ba'dani-ra anakaaraho foriniahaki.




(Ojomo'ihhi abono) Aokhaonaniva mahija a'oni-ra onanokiahivini ida rajomi hoariha. Safini amokhinina vagana nokhoi vagani najahaki forihini nokiana ada. Vanoki o safini apahisirina. Hi'oni anokiki ni-safini hiriha'o, anokiki ida safini amokhinina ka'oa. Anokiki ada safini arabo, nama bikahikori vini fori hina, oniani ida amokhinina anokijahakivini hija. Safini ka'oa hina a'biri'iki afo'boo'da.




Ija'ari hokini kaimoni hihida arabo avahojaki. Kakanamajamajakhamaki  
ida ija'ari va'ini harorohani-ra kaabokavini hiki camada de gases oniki. Kakanamajamajakhamani  
vani ida kanahoariha khamanihija. Ija'ari va'ini harorohani-ra kaabokavini hiki  
arabo-ra nanapajahivini ka'oa avini vani ihimiraraoniki forihiki ida. Oniani ida  
safini vagana khanoraraonini vani, vagana amokhinina ka'oa ida ija'ari binokivini hiki.  
Oniania ida safini vagana amokhinina ka'oa nokianihija. Safini vagana amokhinini  
khanoni arabo, oniani ida joma-ra nakhano jorakiravini hija. Safini khamananina  
vagana okhananavani vani nokiavahaja ida mahi. Niki-ra nanokiavini  
hiki ida safini vagana hi'ida ija'ari kava'ikhamini nahokini hiki-ra radararaonivini  
arabo-ra kaitonia vini hini. Niki hojarijavaha ni-avagajorakiki vaha ida mahi.



Masiko, boviru hiki-ra vada ani'avini nama, ni-masiko, boviru hina ka'oa  
ida ija'ari binokija. Nokiavahaki ada masiko, boviru hiki vagana amokhinina  
safini forihini jaboni ida vagana. Nokiavahani ida vavagana gariraraonini  
khanoni ida vavagana araboa.





Akava'ipahiniva ida vagani-ra anokivini nihanini hidakaba'i. Jahaki ida  
ava'ajhini avakadimia adani a'oni-ra vakava'ibodira bana.  
Hari ba akadi'ojomo'ih i hoarifa abono akanokikhamava.



## KAPITULO 04

### NOKHOI VAGANI, VAGAI NOKIAVAHANI

Nihanini vani ida igithe bakibakinia

nokhoni naha'dini hija?






(Paolo) Hi'ida joma radahaki ihinika-ra akanakanoriha'iki, hida ibavi makaria hojaki. Kodiva'ahi 'banana kamahini-ra khai vani'avini kajomani. Akakhana oadani kasi'i-ra akafoka'ih. Okava'ibodivaraniki ida afo'bo'da nihanini vani ida kasi'i kanokho ka'ba'dani-ra kanaha'dija joma. Hojamanija koda ida vagaki kanokho ka'ba'dania?



(Ojomo'ihhi abono) Iniani bana Paolo. Ni-kasi'i kanokho ka'ba'dania hojaki ida vagaki. Hi'oni akanokiki akadivagaki oni kanokhoa garija, hikori forihini. Hikori forihini hojani oni kanokho ka'ba'dani. Vagaki garini kanokho ka'ba'dania oniani ida ha'diki forinijaja.





(Paolo) Nihaniki vani vagaja koda ida kasi'i

kanokho ka'ba'dani?

Nihaniki ida anokho'ba'dani ha'diriki jaboni?

Nihaniki ida anokho 'ba'dani kasi'i kanokho ka'ba'dani forihiriki?

(Ojomo'ihhi abono) Akava'ihokiva ida kasi'i kahoaran kanokho ka'ba'dani

ka'oa ha'dini nokiavaharini.


Vahojaki adani tapo'ija vahoariha

vanokho 'ba'dani nokiavahani ha'diki forihini.

Jomahi hihaha, jororokoko, jama bodini kajomahini vaovaoha, tapo'ija hoariha

nokhoni 'ba'dani nokiahavani ha'dini forihini hojani.


(Ojomo'ihl abono) Anokho 'ba'dania hojaki ida vagani radahani ibavini ipohini hojani. Radahaki ida vagani anokho 'ba'dani pororoni kania. Bakatha forihini ida anokho pororoni kania hojaki. Vagani o'oini-ra kakodiaki ,kakodiaravini jaboni ida nokhoi pororoni 'dihania hojaki. Vagani arafiani o'oirini biogavini ida nokhoi pororoni 'dihani hojaki , ida nokhoi 'ba'dani pororoni-ra anapa'itxini nihaja. Vagani karahorini o'oirini biogavini vani biakodiaja ida nokhoi 'ba'dani pororoni anakaarahoni nihaja.



(Txiago) Oni'aki ida. Bakatha forihini biakodiavani ida safini vagana o'oini o'oirini, nini vani hojaja ida nokhoi 'ba'dani pororoni.

(Ojomo'ihl abono) Jahaki ida kadarajomi Txiago.

(Ojomo'ih i abono) Nokiavahajakini  
ida nokhoi pororoni biakodiavini,  
biakodiaravini ida vagani o'oini, o'oirini  
nokhoia. Vagani danoni  
nokiavahajakiki




Nokhoi 'ba'dani pororoni akarahoni

ida nokhoi pororoni apa'itxini nokiavahani. Nokhoi  
pororoni 'dihani hojaki ida vagani-ra kakodiaki vaforini nokiavahani.  
Vagani danoriki kania nokiavahaki ida nokhoi pororoni akaarahoni.  
Nokhoi pororoni 'dihani hojaki ida vaforini karahorini nokiani hojani.

(Paolo) Ojomo'ih i abono, anokho 'ba'dani  
pororoni 'dihani hojaki iris onimanija ida?

(Ojomo'ih i abono) Ka'oahiki ida. Hojaki  
ida ija'ari nokhoni bodini porororini  
nokiavahani, korini, korini arafiani,  
hojaki ida ija'ari nokhoni bodini  
pororoka'oarini hojani.



Nokhoi 'ba'dani pororoni apa'itxini


Jahaki aogavini ida nokhoi vagani hoarihani nokiani. Nokhoi 'ba'dani kani hojaki ida nokiani akaarahoni, akaarahorini. Hihida nokhoi 'ba'dani-ra anakaarahoki, anakaarahoriki nokiani 'biho'bihoni. Oniani vani dai nokhoi pororoni-ra kakodiaki nokhoi vagani-ra vasohivini. Nokhoi 'biho'bihoni vani biakodiaja ida amokhini nokiavahani.

(Txiago) Nokhoi 'biho'bihoni vani bikatokiki forihiki ida nokhoi vagani?

(Ojomo'ihhi abono) Okava'ibodivaraniki ida nini.

(Paolo) Oanaha'diki ida avafani hi'ida nokhoi ha'dini-ra anakaarahokia lupa oniki. Vagani-ra gathivini vni anakaarahovini aafani nihani oniani ida avahani-ra anaha'divini hija. Safini afana kania oanaviahavini vani garini avafani-ra anaha'di oamani'ihhi.


(Ojomo'ihhi abono) Navagani hiki ida nokhoi'biho'bihoni garini vani ida vagani oniani ida anakaaraho nihaja. Hi'ida rajomi forihhi nokiani ida nokhoi 'ba'dani vagani-ra anakarahovini. O'oini ida safini vagana nokhoi pororoni bianakaarahovini vani nahina amokhinini-ra anokijahakivini nihija. Safini vagana o'oini nokhoi 'ba'dani 'biho'bihoni-ra radavini vani nokhoi pororoni kania garini nokiajahakini nihaja ida amokhini.



Nokhoi 'ba'dani hojaki ida abohai ipohiki, akarakarakhamani hojani.

Oniani ida nokiavahani okhaja ida bikanamonivini forihini ida ka'da'di kamosini kania.


Ija'ari binokiki napaja nihanini ka'da'di kamosinia bivasohisohiravini ida ija'ari kama'dani 'damania khanorarini. Nokhoi abohani akarakarakhamani ka'da'di kamosinia akhanoni binava'isohiki forihini ida akadiva'ibodivarani nihanini ida nokiavahani ida amokhini.



(Txiago) Haria ini'avinihiki ida anokiki ka'oa hirini, safini vagana amokhinina ka'oa ida nokiavahaki?

(Ojomo'ihhi abono) Ka'oa oamani ida. Anokho'ba'dani vagani bikaragavini forihini ida nahina biakaronavini hini ida moni akhanoni ka'ka'di kamosini kania, bona aogavini ida nahina hini.

(Ojomo'ihhi abono) Vakhaniki jaboni adani igitha, tapo'ija vihiki vanokho 'ba'dani nahina-ra vanokivini ija'ari forivihina jaboni. Vahojaki adani vanokho 'ba'dani ija'ari nokhoni 'ba'dani forihirini jaboni. Rajomi kihiki ada kasi'i kanokho ka'ba'dani ija'ari nokhoni 'ba'dani forikihirina ada. Bikavahojaki ida nokho 'ba'dani nahina hikori forihiki, vagani garini kanokho ka'ba'dani kanavaga nihiki joma bakibakinia. Pisana kania akarahoki ida mithani nokhoni 'ba'dani ija'ari nokhoni 'ba'dani forihirini hojani.



Tapo'ija bakibakinia vahoja vania vanokho'ba'dani pororohani akaarahoni vahojara adani. Nini oadani vani vagaki garini vanokho 'ba'dani hikori forihini vagani ija'ari bivanihaja ida. Oniani ida lanterna vagani garini tapo'ija vanokho 'ba'dania vagani ija'ari bivanihavini hija. Ka'oa hiki ida tapo'ija vanokho 'ba'dani, vagarini ida vagaki garini oniani ida ija'ari vagaki bivaniha vini hija.



Hihadani tapo'ija kasi'i, jomahi hihaha, tapo'ija hoariha vavahojavini ida vanokho 'ba'dani pororohani joma akaarahoni vakadi'bai hiki-ra vahavini joma bakibakini kaba'i, avigavini ida vanani vini ibavini kaimoni. Vakhaniki jaboni adani pisana, jomahi vaovaoha vavahojavini jaboni ida vanokho pororohani akarahoni joma bakibakini kaba'i.






## KAPITULO 05


SAFINI VAGANA BIKABOKAKI IDA BINAJIBINI

VINI IDA VAGAKI-RA NAMONAHAKI

Nahina mani ida vagaki-ra namonahaja safini forihiki?



Avakhanona vaibavia Txiago, Paolo vihiki vanoki'ihiki ida vanaibavi'iki ida painéis solares oniki.



(Paolo) Nahina kaimoni hija bana oni hikori forihiki?

(Txiago) Kodiabi'i hora ni'avini ida aribavi kagorani-ra navagaki kaimoni hini.


(Txiago) Ojomo'ih i abono Gaojino, akava'ibodivaraniki ida anokiki nihanini. Vanibaviki ida hikori karaho forihiki safini vagana-ra gathaniki kaimoni hini aribavia.


(Paolo) Ka'oa oamani ida ojomo'ih i abono, hikori karaho forihini safini kania aviahani bikaabokaki ida safini danona vagana-ra gathanivini hini?

(Ojomo'ih i abono) Hi'ida avanokiki vanaibaviki painéis solares fotovotáico oniki, oniani ida safini danona vagana-ra gathanija. Safini vagana-ra gathanivini vani binaibajahaki forihini ida celular-ra nahokiki forihiki.

(Paolo) Nihanini vani badanija ida?

(Ojomo'ih i abono) Avariga'avini ida safini vagana eletromagnetica oniki, komini forihini nokiavaharini kaba'i hojani. Safini vagana gariraraonini vani bivikhaja ida danona vagaki namonahavini . Oniani ada safini hoarana vagaki-ra namonahavini hojani arabo-ra navaga hahavi vini nihaja. Hi'ida painéis solares oniki vani bigathanija ida safini vagana binaji'biniki ida. Oniani ida gorara navagaki-ra kaabokavini nihaja, televisão ,hajio hiki,nahina hoariha nahokiki forini nihani hija.





(Paolo) Jahaki ida ojomo'ihoni abono.

Aribavi hojaki ida safini vagana  
danona gorara navagaki!

(Ojomo'ihoni abono) Ha'a Paolo ikava'ihokiria  
ida ikabolahani ivadini-ra

iavahahavini. Jorakia sidajia iokhani?

(Paolo) Ha'a ojomo'ihoni abono, okava'ihoki manija ida asia.

Okamitha'ini

ida oimana 'banani karahoni, oniani ida oakava'  
'biriniravini hija.

(Ojomo'ihoni abono) Ikava'ihoki manija ida hospitaosa  
vabadaniki ira vakahinanikavini?

(Paolo) Vaani'iki ida ivadini jaroni amokhinini raio X,  
naothini vanaibavi'iki ida gesso oniki ivadinia.






(Ojome'ihī abono) O raio X hojaki ida  
vagani ija'ari bikaabokaravini  
ida nokhoi ka'oa.

Ikava'ihokijanaki ida?

(Txiago) Okava'ihoki manija ida asia.

raio X ni-hojaki ida komini forihini  
nokiavaharini hojani, ni-komini  
forihini hojaki ida nokiavahani  
nokhoi ka'oa.



(Ojomo'ihhi abono) Jahaki ida Txiago asia ikava'ihokivini. O raio X hojaki ida vagani napaja-ra kaitonia vini. Oniani ida bikaabokavini hija da asafi namania, imaibodinia o'oini ida vagani bianivini ida jaroi amokhinini ka'oa nokiavahani. Oniani ida raio X jaroi amokhinini onivani forihini nanokiavini nihaja. Asafi namani 'dakharini vani, oniani ida jaroi amokhinini-ra nanokiajahakivini hija.

Ihai kabadanihia vakabadaniki vavahojaki ida hoariha vagani amokhini-ra aniki tomografia oniki. Bivahojaki ida nokhoi 'ba'dani forihiki nahina amokhinii-ra aniki câmera oniki. Oniani ka'oa ija'ari jahani bodonia hojani siini,kavamoni hoariha-ra nanokiavini hija ida.

Vavahojaki jaboni  
ida laser oniki,  
ija'ari jahani  
bodinia  
kavamoniki-ra  
vidivini kaimoni hini  
jaboni. Hojaki ida  
oniani forihini ahoarihaonini.









# KAPITULO 06

## MONI OKHANI KAIMONI, VAGAKI-RA ANIKHAKI KAIMONI HINI JABONI

Nahina kaimoni mani ida ahoi forihiki-ra vanaibabibini hija vani  
bodiania?



Vakadi'ojomo'ihī kania avakakhana adani isai.  
Avakakhaha vagavagani vakadi'ojomo'ihī-ra avakanikhavini va'ora  
vanoki'aha adani makhira ahoi forihiki-ra vakanaibavivini vaini bodinia.  
Va'ora vakanamonivini hiki ida ahoi forihiki vanibaviki internet-ra avikhaki  
kaimoni vaini vadinia vaibaviki kaimoni hini. Avakhanona vani  
vakadi'ojomo'ihī abono-ra vanana'dohiha'aha.



(Txiago) Ojomo'ih i abono iogaria ida ahoi forihiki-ra vakanaibavivini vaini bodinia?

Makhira hoarana haria ni'avini ida vavikhavini ida internet, gora-ra navagaki jaboni, hida avaibaviki kania ahoi forihiki khani.

Nihanikia vani ida khani?

(Ojomo'ih i abono) Hi'ida ahoi forihiki onini fibra ótica, oniani vani kania radahaja ida gorara navagaki, internet-ra vikhaki jaboni.

(Paolo) Nihanikia vani khamoja ida?

(Ojomo'ih i abono) Avakava'ihokiria ida safini vagana danona vagani-ra kakodiavini? ikabokaki jaboni ida athi-ra avikhavini, gathani nihini jaboni..

(Txiago) Nahina kaimoi vanaibavija ida ahoi forihiki ojomo'ih i abono?

Ibavijavaha ida internet safini vagana kania jaboni rajomi kaimoni?

(Ojomo'ih i abono) Isai, amonahani kaimoni asia ni-ija'ari bikaabokaki ida.

Vakana'bo oni gora i'oarini kabakathani mahija a'oni-ra onanokiahivini ida nahina avarigaki afokaho.

Vada vani'a hida akadivagaki

oanaha'divini vagani

akarafarakhamani nokiavahani

gora bodinia.

Oniani ida ahoi forihiki-ra

vanaibavivini hija vaini bodinia,

napaja-ra kaitoniaki moni-ra avikhaki,

athi-ra avikhaki gathanahani hiki jaboni.

(Paolo) Nihanikia vani vagaki biavikhaja ida moni athi hiki jaboni?




(Ojomo'ihī abono) Moni-ra avikhaki, gathani nihiki ida vagaki bikaaboka manija ida binaibavijahavini ida.

Vagaki bikaaboka manija ida binaibavi jahavini ida moni khaki,okhaki jaboni. Vanaibaviki ida laser oniki ahoi forihiki jahani bodinia. Ahoi forihiki jahani bodinia vanaibaviki ida nahina ha'dini danoki oniani ida binavagaki forihini nihaja. Vanaibavi jaboniki ida hikori forihiki bianikhahaki - ra kaitonia vini.

Ha'dini danoki laser oniki,vagani akakhamarini kaimoni ida vanaroaravini nihaja, oniani ida vagani-ra akanarafarakhamaravini hija.

(Txiago) Jahaki ida ojomo'ihī abono. Oniani ida vanaibaviki vagani danoni bikaitonia vinihija, ahoi forihiki jahani bodinia bianikhahaki kania.

(Ojomo'ihī abono) Ka'oa hiki ida!



**(Paolo) Jahaki ida ojomo'ihhi abono. Aribavi hojaki ida safini vagana danona gorara navaki hojani, avahojaki ida arabo hoariha, ija'ari vahoariha vaibaviki nahina namithaki aogavini nihaja jaboni.**

**(Ojomo'ihhi abono) Hihida internet-ra avahoja'avini vani ida namithaki, akadibadani, akadihojai-ra ananokiavini hini, hida akadiarabo kaija'arini, arabo hoariha kaija'arini vakadimoni vanokivini. Ibavi makari kahijava-ra vara'akani'akhamavini hini, kakodiahi-ra akanikharia vini, nahina hoariha-ra anamonahavini-ra akaabokavini.**

**(Txiago) Ojomo'ihhi abono, hi'ida ahoi forihiki fibra ótica oniki vakanaibaviki internet ka'oa-ra vikhaki ida?**

**(Ojomo'ihhi abono) Iniani. Hojaki ida nahina hoariha kidiania khaki. Rajomi hiki ida ihai kabadanihi kania, biakodiaki adani ija'ari vanokho ka'oa vanokiriki ida kavamoni jahai bodinia hojaki. Va'ora kakodiaki adani kaho-ra vakanamonahaki jaboni.**

**Aokhaonaniva mahija a'oni-ra onanokiahivini kaimoni.**


(Ojomo'ihī abono) Hihida mahi ana'diahi iki ida safini vagana, danoni nahina hoariha-ra no'avini forihī ida vagana. Avaka'ojomo'i iki ida safini vagana jahaka'oani akadimoni hini. Safini vagana, joma bakibakiki kaimoni hini ida gorara navagaki, nahina hoariha kaimoni hini jaboni. Asia hojaki ida nahina avaka'ojomoriki, avarigaki asia jaboni. Avanaothini vanamitharonisigaki bana adani vaka'ojomo'ivini jahaja, avigavini kaimoni ida nihanini ida safini vagana, hoariha-ra no'avini forihini ida danona vagana ija'ari biogaja kaimoni.



# CAMINHOS DA LUZ

Uma viagem pela Amazônia

I S B N 9 7 8 - 8 5 - 6 9 7 1 9 - 0 6 - 9



978-85-69719-06-9

APOIO

Instituto 

 INSTITUTO FEDERAL  
**AMAZONAS**  
Campus Lábrea

 **UNIR**  
FUNDAÇÃO UNIVERSITÁRIA  
FEDERAL DE RORONÓIA

 **CNPq**  
Conselho Nacional de Desenvolvimento  
Científico e Tecnológico

 **CAPES**

**Ministério da  
Ciência, Tecnologia  
e Inovação**